

'Pastikan bekalan tidak terputus'

**KPDNHEP
laksana 128,085
pemeriksaan
premis niaga
di Malaysia**

PUTRAJAYA

Selain mengawasi harga barangan, Kementerian Perdagangan Dalam Negeri dan Hal Ehwal Pengguna (KPDNHEP) juga akan memastikan bekalan barangan asas terkawal seperti petrol, diesel, gula, tepung gandum dan minyak masak konsisten dan tidak pernah putus.

Berkongsi peranan KPDNHEP dalam satu temubual baru-baru ini, Ketua Setiausaha kementerian itu, Datuk Muez Abd Aziz berkata, harga barangan sentiasa menjadi keutamaan pengguna, namun perihalan bekalan barangan sama ada mencukupi atau sebaliknya kurang diberi perhatian.

"Kalau bekalan itu tidak ada, macam mana?" soal Muez ketika melontarkan pandangan mengenai tanggungjawab dan cabaran KPDNHEP memastikan kesejahteraan pengguna.

Berkongsi kaedah memastikan bekalan konsisten dengan memberikan contoh jika stok tepung terputus, Muez berkata, KPDNHEP ada kuasa untuk mengimport barangan tersebut bagi mengatasi masalah yang berlaku.

"Berkaitan bekalan minyak



MUEZ

petrol pula, stesen minyak yang terputus bekalan atau menutup operasi tanpa memaklumkan kepada KPDNHEP adalah melakukan kesalahan dan boleh didenda di bawah Akta Kawalan Bekalan 1961 iaitu kompaun atau ditarik lesen operasi," katanya.

Muez turut berkongsi usaha mengawal harga dalam menghadapi kenaikan kos sara hidup melalui inisiatif Skim Harga Maksimum Musim Perayaan (SHMMP) yang ditambah baik menerusi tempoh pelaksanaannya dipanjangkan pada musim perayaan seperti Hari Raya Aidilfitri, Tahun Baharu Cina, Deepavali, Krismas, Hari Gawai dan Pesta Kaamatan.

Selain itu, katanya, sepanjang pelaksanaan SHMMP pada tahun 2019, sebanyak 128,085 pemeriksaan telah dijalankan ke atas premis niaga di seluruh negara merangkumi 3,116 pemeriksaan ke atas premis borong dan 124,969 ke atas premis runcit.

Kata Muez, tindakan tegas



Ketua Seksyen Siasatan KPDNHEP Putrajaya, Shamsul Nizam Khalil (kiri) melihat sebahagian selipar tiruan berjenama yang dirampas dalam satu serbuan di Kawasan Perindustrian Menglembu, Ipoh 18 Disember lalu.

akan diambil kepada peniaga yang gagal mematuhi peraturan di bawah Akta Kawalan Harga dan Antipencatutan 2011 dan penalti bagi kesalahan menjual barangan terkawal melebihi harga maksimum serta gagal meletakkan tanda harga.

Muez turut berkongsi mengenai usaha kerajaan mengawal harga barang asas seperti gula dan tong gas petroleum cecair (LPG) seberat 12 kilogram.

Dengan melakukan perbandingan harga di Malaysia dan Hanoi, Vietnam, menurut Muez, harga satu tong LPG 12kg di Malaysia adalah RM22.80, manakala di Hanoi harganya mencecah RM70 satu tong.

"Gula di Hanoi harganya RM5 sekilogram berbanding di Malaysia RM2.85 kilogram," katanya.

Katanya, KPDNHEP juga berusaha menaikkan profil Malaysia di peringkat global termasuk meminda beberapa akta serta menguatkuasakan Akta Cap Dagangan 2019 menggantikan Akta Cap Dagangan 1976 (Akta 175).

Katanya, Akta Cap Dagangan 2019 yang diluluskan pada Julai lepas membolehkan Malaysia menyertai Protokol Madrid bagi memudahkan usahawan tempatan membuat pendaftaran jenama produk dengan *one single filing* serta mendapatkan perlindungan jenama di 122 negara termasuk Amerika Syarikat, Australia, United Kingdom dan Brazil.

Tambahnya, pada tahun 2020, pindaan akan dibuat melibatkan Hak Cipta dan Paten supaya Malaysia setanding dengan negara lain dari segi perlindungan harta intelek. - Bernama